

Oqaasiliortut pillugit Inatsisartut inatsisaat

Kapitali 1

Atorneqarnera

§ 1. Naalakkersuisut pilersippaat Oqaasiliortut, siunertaralugit kalaallit oqaasiisa ataavartinnissaat, siuarsarnissaat aamma patajaallisarnissaat, aamma oqaatsit taakku kulturimik attassisutut attaveqaaqatigiissitsitutullu atuuffii eqqarsaatigalugit.

Stk. 2. Oqaasiliortut ingerlatsiviupput Namminersorlutik Oqartussat ataanni. Oqaasiliortut piginnaatitaanerat tamakkiisumik ilaannakuusumilluunniit allanut tunniunneqarsinnaangilaq.

Kapitali 2

Suliassat

§ 2. Oqaasiliortut suliassaraat:

- 1) kalaallit oqaasiisa ineriartornerat malittarissallugu, tassunga ilagitillugu kalaallisut oqaatsit, oqariartaatsit aamma oqaasilioriaatsit nutaat oqaasersiallu katersussallugit nalunaarsussallugillu,
- 2) oqaatsinik eqqussanik (taarsiullugu oqaasiliat) kalaallisut pisortatigut atortussanngortitanik taaguusiussallutik,
- 3) suliassaqaqfinni taaguusersuutit akuerisassallugit, ilagitillugit sulinermi oqariartaatsit suliaqaqfinnilu aalajangersimasuni oqaasilioriaatsit, takuuk imm. 3,
- 4) aqqit siuliaqutit kalaallisuumit pilerfillit akuerisassallugit, inuit aqqinut inatsit naapertorlugu kunngip peqqussutaatigut Kalaallit Nunaannut atuutilersinneqartumiittut,
- 5) pisortatigoortumik kalaallisut allattaaseq aalajangersassallugu, takukkit §§-it 3-5, aamma taanna tamanut saqqummiutissallugu, aalajangiisartut eqqortumik allannermut malittarisassiaannut naapertuuttumik aqqissorneqarlunilu saqqummiunneqartartussakkut,
- 6) kalaallit oqaasii pillugit aamma allamiut oqaasiisa nutaat aqqillu atugaanerannik pisortat inuillu siunnersortassallugit, ilitersortassallugit qaammarsartassallugillu,
- 7) Nunat Aqqinik Aalajangiisartut, pisortat, suliffeqaqfiit il.il. kalaallisut aternik atortuulersitanik saqqummiussisartut kalaallisulluunniit aternik innersuussuteqartartut suleqatigisassallugit, aamma
- 8) nunani allani ingerlatsiviit assingusut suleqatigisassallugit.

Imm. 2. Naalakkersuisut Oqaasiliortut allanik suliassissinnaavaat inatsimmi suliassatut pisussaaffiusunut attuumassuteqartuni.

Imm. 3. Oqaasiliortut ilisimasalittut suleqatigiissitalianik pilersitsissaaq suliassaqaqfinni taaguusersuutininik Oqaasiliortunut akuersissutigisassatut inassuteqartartunik.

Imm. 4. Oqaasiliortut suliassat aalajangersimasut naammassiniarlugit piffissami killilikkami

ataatsimiititaliat pilersissinnaavaat, suleqatigiit imaluunniit suliaqatigiit Oqaasiliortunit ilaasortaaffigineqartut imaluunniit avataaneersunit immikkut suliatigut piginnaasalinnit peqataaffigineqartut.

§ 3. Pisortatigoortumik kalaallisut allattaatsitut paasineqassapput eqqortumik allannissamut malittarisassat, killiffilersuutit, kalaallisut allassimasutigut oqaatsini naalisakkanik aalajangersaaneq atuisitsinerlu.

§ 4. Pisortatigoortumik kalaallisut allattaatsimik aalajangersaanermi Oqaasiliortut tunngavissanik pingaarnernik eqqortumik allannissamut najoqqutassanik aalajangersaasassapput. Tamanna pisassaaq Naalakkersuisut tamatuminnaga oqaaseqarfiginnereernerisigut.

Imm. 2. Oqaasiliortut tunngavissanik pingaarnernik aalajangersaanerminni aalajangersartassavaat nunat aqqinik eqqortumik allannissamut tunngavissat pingaarnert. Tamanna pisassaaq tamakku pillugit Nunat Aqqinik Aalajangiisartunik siunnersoqatigeereernikkut.

Imm. 3. Allattaatsimik allannguineri Oqaasiliortut namminnek allannguisinnaapput naleqqussaasinnaallutillu pissutsini tunngavissanik uniuinngitsuni. Allannguinerit tunngavissanik uniuisut pisinnaapput Naalakkersuisut tamanna pillugu oqaaseqartereernerisigut.

§ 5. Pisortatigoortumik kalaallisut allattaaseq, taarsiullugu oqaasiliat nutaat aammalu Oqaasiliortut suliassa qarfinni taaguusersuutit akuerisaat malinneqassapput atorineqassallutillu pisortatigut ingerlatsivinnit, Inatsisartunit aamma oqartussaaffinnit Inatsisartunit eqqartuussiveqarfinnullu attuumassuteqartunit tamanit.

Imm. 2. Pisortatigoortumik kalaallisut allattaaseq aammattaaq malinneqassaaq ingerlatseqatigiiffinnut, suliffeqarfinnut il.il. pisortatigut ingerlatsivittut naatsorsuunneqanngitsunut, taakkua suliaannut aningaasartuutit annertunerusut Namminersorlutik Oqartussanit imaluunniit kommunit ilaannit matussuserneqartartuuppata, imaluunniit ima annertutigisumik taakku inatsit naapertorlugu piginnaatinneqarpata Namminersorlutik Oqartussat imaluunniit kommunit ilaat sinnerlugu aalajangersaasinnaallutik.

Kapitali 3

Oqaasiliortut katitigaanerat aningaasarsiaqartitaanerallu

§ 6. Oqaasiliortut Naalakkersuisunit toqqarneqartartunik tallimanik ilaasorta qarput. Ilaasortat ukunannga innersuussuteqareernikkut toqqarneqartarput:

- 1) Ilisimatusarfik.
- 2) Nunatta Atuagaateqarfia.
- 3) Kalaallit Atuakkiortut.
- 4) Tusagassiornermi Sulisut Peqatigiiffiat.
- 5) Nutserisunut oqalutsinullu kattuffik.

Imm. 2. Imm. 1 naapertorlugu susassa qartut ilaasortassanik innersuussisussat tamarmik qinigassanik marlunnik innersuussissapput.

Imm. 3. Oqaasiliortut katillutik sinniisuuffigissavaat oqaatsitigut suliat, inuiaqatigiinni suliat aamma

kultureqarnikkut paasisimasaqassuseq, ilaasortat aamma Kalaallit Nunaanni najugaqavissuussapput.

Imm. 4. Ilaasortat ataasiakkaat tamarmik suliaasaqarfimmi arlariinniluunniit piginnaaneqartuussapput Oqaasiliortut ataatsimut sinniisuuffigisassaanni, takuuk imm. 3.

Imm. 5. Minnerpaamik ilaasortaq ataaseq oqaluttaanermi aamma nutserisuunermi sulianik piginnaaneqartuussaaq.

Imm. 6. Oqaasiliortut siulittaasussartik namminneq qinertarpaat.

§ 7. Oqaasiliortuni ilaasortat toqqarneqartassapput piffissami killilikkami ukiut sisamakkuutaarlugit, siullerpaamik 1. januaari 2018-imiit 31. december 2021-p tungaanut.

Imm. 2. Ilaasortat toqqaqqinneqarsinnaapput.

Imm. 3. Ilaasortap ataatsip toqqaagaaffiup iluani tunuarneratigut Naalakkersuisut ilaasortassamik nutaamik toqqaassapput. Naalakkersuisut toqqaasarneminni qularnaassavaat Oqaasiliortut § 6, imm. 3 aamma 4-mi piumasaqaatinik naammassinninnissaat. Ilaasortaq nutaaq toqqarneqassaaq piffissap ukiunut 4-nut killilikkap sinneranut.

Imm. 4. Naalakkersuisut toqqaagaaffiup iluani ilaasortaq ataaseq tunuartissinnaavaat, ilaasortaq assersuutigalugu peqataalluanngippallaarnikkut imaluunniit allatigut pisussaaffimmut tamatumunnga piukkunnaataarussimatillugu.

§ 8. Oqaasiliortunut ilaasortat aningaasarsisassapput Inatsisartunut Naalakkersuisunullu ilaasortat aningaasarsiaqartitaanerat il.il. pillugit Inatsisartut inatsisaanni kapitali 7 naapertorlugu.

Kapitali 4

Oqaasiliortut aningaasalersugaanerat

§ 9. Oqaasiliortut sulinerat aningaasalersugaassaaq Nunatta karsianit.

§ 10. Oqaasiliortut ukiut tamaasa Naalakkersuisunut ukiumut tulluuttumut aningaasaliissutissanut missingersuummik siunnersuuteqartassapput, Naalakkersuisut tamatumunnga periarfissatut killigitatut aalajangigaat qaangiutsinnagu. Oqaasiliortut ukiumut tulluuttumut Nunatta karsianit aningaasaliissutissat annertussusissaannik siunnersuuteqartassapput.

§ 11. Oqaasiliortut ukioq naatsorsuiffiat tassaassaaq ukioq aningaasaliiffusoq. Aalajangiisartut taakku Namminersorlutik Oqartussat missingersuusiorneq, naatsorsuuserineq aamma naatsorsuutiniq saqqummiussisarneq pillugit aalajangersagaat piffissani tamani atuuttut malittassavaat.

Imm. 2. Ukiumoortumik naatsorsuutit Namminersorlutik Oqartussat kukkunersuiusinit kukkunersiorneqartassapput.

Imm. 3. Naalakkersuisut killissarititaat nallertinnagu Oqaasiliortut ukiumoortumik naatsorsuutit Oqaasiliortunit akuerisat Naalakkersuisunit akuerisassanngorlugit saqqummiuttassavaat.

Imm. 4. Oqaasiliortut naatsorsuutitik Naalakkersuisunit akuerineqareeraangata tamanut saqqummiuttassavaat.

Kapitali 5

Oqaasiliortut sulinerat

§ 12. Oqaasiliortut suliaminni, tassunga ilagitillugit aningaasaliissutitigut ingerlatsinerminni, Naalakkersuisunut akisussaasuupput.

§ 13. Oqaasiliortut sulinertik pillugu Naalakkersuisunut ukiumoortumik nalunaaruteqartassapput. Nalunaarusiaq tamanut saqqummiunneqartassaaq.

Imm. 2. Nalunaarusiap imarisassavai ukiumi qaangiuttumi Oqaasiliortunit suliniutigisimasat pillugit nassuiaat tassunga ilagitillugit suliassa qarfiit pingaartut oqaaseqaatillu ukiup ingerlanerani saqqummiunneqartartut, aamma Oqaasiliortut siunissami suliniutigiumasaannut pilersaarut. Nalunaarutip aammattaaq imarissavaa siuliani nalunaarummit suut naammassiniagaasimanersut.

Imm. 3. Naalakkersuisut ukiumoortumik nalunaarutip imarisassai pillugit malittarisassanik ilassutini aalajangersaasinnaapput.

§ 14. Oqaasiliortut ukiup ingerlanerani ikinnerpaamik marloriarlutik ataatsimiittassapput. Ataatsimiinnerit tamanut ammasuunngillat.

Imm. 2. Ataatsimiinnerni ullormut oqaluuserisassat ima qarniliallu tamanut saqqummiunneqartassapput. Ullormut oqaluuserisassat ima qarniliallu imaasa ilai tamanut saqqummiussinermi mininneqarsinnaapput, taamaaliortoqarnissaanut immikkoorluinnartunik pissutissaqarpat.

§ 15. Oqaasiliortut ingerlatsinerminni malittarisassatik, Naalakkersuisunit akuerineqartartussat, namminneq aalajangersartassavaat.

Imm. 2. Ingerlatsinermi malittarisassat imarissavaat ataatsimiittarnerit pillugit malittarisassat, taasisarnerni malittarisassat, aalajangersaanerni akuusinnaaneq ima qarniliamillu suliaqarneq.

§ 16. Oqaasiliortut aalajangersagaat pisortatigut oqartussaaffimmut allamut suliassiissutigineqarsinnaanngillat.

§ 17. Oqaasiliortut allattoqarfimmit ikiorneqassapput.

Imm. 2. Allattoqarfup Oqaasiliortut suliaannut atasumik ileqqusutut allattoqarfittut suliassat ingerlatissavai, tassunga ilagitillugit suliassat Oqaasiliortunit suliarineqartussat piareersartarneri, ataatsimiinnissat piareersarneri, Oqaasiliortut suliaannik nalunaarsuineq aamma Oqaasiliortut aalajangersagaannik atortuulersitsisarneq.

Imm. 3. Allattoqarfup Oqaasiliortut suliaannut atasumik ingerlatsinermini suliat ilisimatusarnermik tunngavilimmik ingerlatissavai.

§ 18. Oqaasiliortunut allattoqarfikkut sullissineq Naalakkersuisunit isumagineqassaaq.

Imm. 2. Naalakkersuisut aalajangersarsinnaavaat allattoqarfup suliffeqarfanni Naalakkersuisut tapiissutaannit annerusumik aningaasalersorneqartuni inissisinnissaa.

§ 19. Naalakkersuisut Oqaasiliortut suliassaannut sulinerannullu malittarisassat aalajangersarsinnaavaat.

Kapitali 6

Misiligutitut aaqqissuussinerit

§ 20. Naalakkersuisut akuersissutigisinnaavaat misiligutitut aaqqissuinerit Inatsisartut inatsisaata aalajangersagaasa iluanni.

Kapitali 7

Atuutsitsilernissamik, ikaarsaariarnermik atorunnaarsitsinissamillu aalajangersakkat

§ 21. Inatsisartut inatsisaat 1. januar 2018 atortussanngortinneqarpoq.

Imm. 2. Peqatigitillugu aalajangersakkat makku atorunnaarsinneqarput:

- 1) Oqaasiliortut pillugit Inatsisartut inatsisaat nr. 12, 26. oktober 1989-imeersoq.
 - 2) Kalaallit allattaasianni allannguutit pillugit Landsrådet ileqqoreqqusaat 14. maj 1973-imeersoq, taamaattoq tak. imm. 3.
 - 3) Namminersorlutik Oqartussat nalunaarutaat nr. 23, 15. maj 1990-imeersoq Oqaasiliortut pillugit.
- Imm. 3.* Oqaasiliortut tamanna pillugu allannguinerinik aalajangersaannginnerini allattaaseq Landsrådet ileqqoreqqusaanni imm. 2-imi taaneqartumi aalajangersarneqartoq atuutissaaq.

Namminersorlutik Oqartussat, 1. juni 2017.

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

